

CARTA JA NI NTEE SAN PABLO APOSTOL NUU TITO

1 ¹Maá nī cúu Pablo, mozo Yāā Dios jíin apóstol Jesucristo, chi nī ntají Yāā Dios nduhū jā scándíja nī nchivī jā ní nacāji yā, tácuā jīcūhun inī ji tūhun ndāā yā jā cándíja ó,
²de cuhun inī ji jā cutecū ji níí cání. Chi jondē ncháha ca jēcōo ñayiví de ja nī nquee yuhú Yāā Dios jā cutecū ō, de íyó ndāā tūhun jā ní ncāhān yā.
³De mitan jā ní nquenda tiempo jā ní jani yā, de stéhēn cājí yā tūhun yā nūū ō. De nī ntetínú yā nduhū nī ndacu yā tiñu jā nacani nī tūhun yā ñúcuán. Chi Yāā jā scácu yóhó cúu yā.
⁴De tēe nī carta yáhá cuēē nūū nū Tito, chi tá cúu sēhe nī cúu ndija nú sīquī jā inuú-ni cándíja ó yā. De ñúhún inī nī jā Tatá ó Yāā Dios jíin Jētohō ō Jesucristo, Yāā jā scácu yóhó, ná sáhá cā yā jā váha ndóhó, de cundáhvī inī yā ndóhó, de sáhá yā jā coo ndeé coo siī inī nū.

Tiñu yā jā ní nsāhá Tito jondē isla Creta

⁵De nī sndóo nī ndóhó jondē isla Creta, tácuā sáhá ndāā nū sīquī tiñu jā cúmanī cā cundaā, de cani nú ndācá tēe ñáhnú jā coto grupo nchivī cándíja ndācá ñuū, tá cúu nūū ní ndacu nī tiñu nūū nū.
⁶De ndá tēe ñáhnú ñúcuán cánuú jā má cōó nī iin jā nīhīn nchivī cuāchi sīquī dē. De cánuú coo iin-ni ñasíhí dē. De sēhe dē cánuú cuu ji sūchí cándíja, jā má nīhīn nchivī cuāchi sīquī ji jāá nduú sáhá váha ji á jā nīhin inī ji nūū dē.
⁷Chi ndá tēe cúñáhnú jā ndíso tínú nūū nchivī cándíja, cánuú caca ndāā dē chi ndíso tínú dē sīquī tiñu Yāā Dios. De mā sáhá téyíí dē maá dē, mā quíti ñamā inī dē, mā cūú dē tēe jíni, mā cánāá dē, de mā ndíyo inī dē xūhún.
⁸Chi sa cánuú jā níní cuāha núú dē vehe nūū nchivī jīcá, de níní sáhá dē tiñu váha, de ndito coo xīnī dē, de cuu dē tēe ndāā, de coo ndoo ánō dē, de casī dē modo jā cúni maá dē.
⁹De cánuú jā cuiñi nīhin dē jíin tūhun ndāā jā ní scuáha dē, tácuā cuu sndíhvī inī dē nchivī jíin ndācá tūhun ndāā váha, de suni cuu sáhá dē jā jīcūhun inī nchivī jā cúu contra, de casī ji yuhú ji.

¹⁰Chi íyó cuāhā nchivī nīhin inī, de stēhēn jī incā modo jā jāni naā inī maá jī de stáhvī jī nchivī. De ndá táhán ó hebreo cúu jā víhí cā sáhá súcuán.

¹¹De cánuú jā casī nū yuhú ndācá tēe ñúcuán, chi stēhēn ndá dē tūhun jāá nduú íyó vāha jā stēhēn dē, chi cúnī dē jā nīhin dē xūhún sīquī. De súcuán sácā nuu dē xīnī ndihi nchivī ndācá vehe.

¹²De iin tēe isla Creta jā nācani tūhun, nī ncāhān dē sīquī táhán ñuū dē: Ndá táhán ó nchivī Creta, chi maá-ni nchivī stáhvī cúu jī, de tá sáhá quiti xēen sáhá jī, de maá-ni jā ndíhvī inī jī caji cuāhā jī, de cúxí jī, cáchī dē.

¹³De ndāa cúu tūhun jā ní ncāhān tēe ñúcuán. Jā ñúcuán cuxeēn nū nūū jī, tácuā ná cándíja ndāa vāha jī.

¹⁴De mā sáhá jī cuenta ndācá tūhun jā ní ntavā ndá táhán ó hebreo, jā maá cuento-ni cúu, de juni mā squíncuu jī tiñu jā ndācu ndá tēe jā ní nquee nūū tūhun ndāa.

¹⁵De nchivī jā ní ndundoo jāá ntúnī, chi ndācá-ni íyó vāha íyó ndoo nūū jī. Sochi nchivī nduú cándíja jāá nduú ní ndúndoo jāá ntúnī, maá-ni jā jāni inī jī jāá nduú íyó ndoo nduú íyó vāha ndācá jā jínī jī nūū. Chi jondē jāá ntúnī jī jín ánō jī íyó téhén.

¹⁶De vísō cáhān jī jā jínī jī Yāa Dios, sochi jín tiñu jā sáhá jī de jínī ō jāá nduú. Chi nchivī nāvāha nchivī nīhin inī cúu jī, de nduú cúu sáhá jī ni iin tiñu vāha.

Tūhun yā jā stēhēn ndāa vāha

2 ¹De maá nú chi nínī cāhān nū ndācá tūhun jā quétáhán jín tūhun yā jā stēhēn ndāa vāha.

²De cāhān nū jín ndācá tēe ñáhnú jā ná cóo cájí inī dē, de sáhá yíñúhún dē, de ndito coo xīnī dē, de cándíja nīhin dē tūhun jā cúndáhvī inī yā dē, de cundáhvī inī dē táhán dē, de cuandee inī dē.

³De saá-ni ndācá ñahan ñáhnú, ná sáhá yíñúhún ña, de mā sáhá túhún ña, de mā jínī ña. De ná stēhēn ña ndācá jā vāha.

⁴De ná stēhēn ña nūū ndá ñahan súchí jā coo manī ña jín yíí ña jín sēhe ña.

⁵De ndito coo xīnī ña, de coo ndoo ánō ña, de coto vāha ña tiñu vehe ña, de coo vāha inī ña, de cuetáhvī ña nūū yíí ña, tácuā mā cāhān nēhén nchivī sīquī tūhun Yāa Dios.

⁶De suni súcuán sndíhvī inī nū ndācá tēe suchí jā ndito coo xīnī dē.

⁷De ndóhó, cuu nú iin ejemplo nūū dē jā sáhá nú ndācá tiñu vāha. De tá stēhēn nū nūū dē de ndāa stēhēn nū de serio coo nú.

⁸De ndāa vāha stēhēn nū, tácuā mā cūú cāhān nchivī sīquī. De súcuán de cucanoō nchivī jā cúu contra, chi mā cūú cāhān jī ni iin cuāchi sīquī nū.

⁹De cāhān nū jín nchivī jā cúu mozo jā ná cuetáhvī jī nūū patrón jī, de ná sáhá jī ndācá tiñu jā jétahān inī dē, de mā cāhān jī tá ndacu dē tiñu nūū jī.

¹⁰De mā sácuíhná ji ndatínú dē, chi ná cúu ji nchivī ndāā ndija, tácuá jíin ndācá tiñu jā sáhá ji, de cunī ndācá nchivī jā viī ndasí cúu tūhun jā stéhēn sīquī Yāā Dios, Yāā jā scácu yóhó.

¹¹Chi mitan ja nī stéhēn Yāā Dios nāsa sáhá yā jā váha nchivī, chi cúnī yā scácu yā ndihi nchivī ñayiví.

¹²De sīquī jā vāha inī yā jíin ó, suu stéhēn nūū ō jā siáā ō tiñu néhén jíin ndācá jā ndíyo néhén inī ō. De ndito ná cóo xīnī ō inī ñayiví yáhá, de caca ndāā ō, de sáhá vāha ó jā cúnī Yāā Dios.

¹³De suni stéhēn nūū ō jā cuhun inī ō jā quendōo ndetū ō tá quiji maá quivī cāhnú jā nenda nijin Yāā Dios, Yāā cúñáhnú ndasí, suu Jesucristo, Yāā jā scácu yóhó.

¹⁴Chi nī nsōcō yā maá yā jēhē ō, tácuá scácu yā yóhó nūū ndācá tiñu néhén, de sáhá ndoo ndihi yā ánō ō jā cuu ó nchivī maá yā, de cundihvī inī ō sáhá ó tiñu váha.

¹⁵Ndācá tūhun yáhá cánuú stéhēn nū, de sndíhvī inī nū ji, de cāhān nū nūū ji, chi sūcuán ndíso tíñú nú. De mā cuáha nú tūhun jā sáhá jéhe inī ni iin ji nūū nū.

Nāsa cánuú sáhá nchivī cándíja

3 ¹De nasndíhvī inī nū ji jā cuetáhvī vāha ji nūū ndá tēe cúñáhnú jíin tēe ndíso tíñú ñuū. De ná squíncuu ji tiñu jā ndácu ndá dē, de coo ñamā inī ji sáhá ji ndācá tiñu váha.

²De mā cāhān néhén ji sīquī ni iin nchivī, de cundeē mānī ji jíin nchivī, de coo vāha inī ji, de coo vitá inī ji jíin ndihi nchivī.

³Chi maá ó suni nī ncuu ó nchivī naā jāá nduú ní jícūhun inī ō jondē saá, de nī ncunīhin inī ō nūū Yāā Dios. De nī ncandíja ó ndācá tūhun jāá nduú ndāā, de nī nsatínú cāhá ó nūū ndācá jā ní ndíyo néhén inī ō jíin nūū ndācá jā ní ncusiī inī ō. De nī jica ó jíin tiñu néhén jíin tūhun cúcuásún inī. Chi nī nguīti inī nchivī nūū ō, de nī nguīti inī ō nūū ji.

⁴Núcuán de Yāā Dios, Yāā jā scácu yóhó, nī stéhēn yā jā vāha inī yā de cúndáhvī inī yā ndihi nchivī ñayiví.

⁵De nī scácu yā yóhó, de nduú nā tiñu váha ní nsáhá ó jā scácu yā yóhó, chi sa sīquī jā ní ncundáhvī inī yā yóhó. Chi nī naquete yā ánō ō, de sūcuán nī nacacu jeé ó, de nī ndujeé ó nī nsáhá yā jíin maá Espíritu Santo.

⁶De nī ncunuú ndasí Espíritu Santo inī ánō ō, jā ní nsáhá Yāā Dios jā jíin Jesucristo, Yāā jā scácu yóhó.

⁷De sūcuán nī sndáhvā yā cuāchi ó sīquī jā vāha inī yā, de nīhīn táhvī ō cutecū ō ní cání, tá cúu nūū ñúhún inī ō.

⁸Ndāā cúu tūhun yáhá, de cúnī ni jā níní cāhān nīhin nú ndācá tūhun yáhá, tácuá nchivī cándíja Yāā Dios, ná cúndihvī inī ji cucuu ji jíin tiñu

váha. Chi íyó vāha ndācá yáhá, de níhīn tīnú jā quéndōo vāha ánō ndihi nchivī.

⁹De mā quívi nduū nū jín ndācá tūhun naā, jín tūhun jā cáhān sīquī nāsa vāji ndācá tatā ō, jín tūhun jā sáhá jā tétáhán ji sīquī ley Moisés. Chi maá-ni tūhun cāhá jāá nduú níhīn tīnú cúu.

¹⁰De tú íyó nchivī jā sáhá jā ndúsín inī nchivī cándíja, de cáhān nū nū ji iin ūū vuelta, de tú mā chūhún inī ji, de tavā nū ji.

¹¹Chi jín nū jā iin nchivī jā sáhá súcuán, stívī ndasí ji chi jín ji jāá nduú vāha sáhá ji, de jā ñúcuán jícundeē cuāchi sīquī ji.

Jā cána Pablo jā quiji Tito nū dē

¹²De tá tají nī Artemas á Tíquico cuēē dē, sá de nducú ndéé nú quiji nú nū ni ñuū Nicópolis, chi ja nī ncundaā inī ni jā ñúcuán cundeē ni tiempo vījin.

¹³De cundihvī inī nū chindeé nú Zenas, tēe cúu abogado, de saá-ni Apolos. Chi cuāha nú jā jín ñúhún dē jā quíhīn cā dē ichi nū quíhīn dē. De coto nú jā má cúmanī ni iin nū dē.

¹⁴De nchivī jā íñí jín ó, cánuú jā cutūha ji sáhá ji ndācá tiñu vāha, de chindeé ji nchivī jā cúmanī nū, tácuā mā cútecū cāhá ji.

Saludo jín bendición jā sándihí

¹⁵Ndācá nchivī jā íyó jín nī yáhá, cáhān ji jā sáhá ndeé inī nū. De cachi nū jā cáhān ni jā sáhá ndeé inī nchivī jīñā jā mānī ō jín sīquī jā cándíja ó. De ñúhún inī ni jā ná sáhá cā Yāa Dios jā vāha ndá ndóhó. Súcuán ná cóo. Amén.